imaginé vne si grande fourbe? Les iesuites sont trop versés aux saintes escritures pour ignorer ce qui est en sainct Iean: que le pere ne iuge personne, mais a donné tout iugement à son fils: et puissance de faire iugement, par ce qu'il est fils de l'homme. L'escolier qui faisoit ce personnage s'appelle Iosué de Villeneuue, et n'y en auoit aucun autre qui representast Dieu, que ce droleur mentant appelle iesuitique.

Il continue de mentir avec ces paroles :

« Entre ces personnages estoit le pape et sa suite. »

Car de tous ces trois iours iamais ny pape, ny cardinal ne fut veu sur le theatre. Mais ie coniecture pourquoy il a feint icy le pape: i'en toucheray incontinent la raison, après que vous l'aurez ouy, prononçant ceste autre menterie.

« Le premier iour, dit-il, fut employé à loger le pape, et « ses adhérans, au paradis de bois des iesuites, suyuant la « sentence prononcée par leur nouveau dieu. »

Que dites-vous de cest homme, messieurs? Parlant de ce paradis de bois, ne se monstre-t-il pas auoir la ceruelle de bronze, faite pour chocquer contre la vérité, et toujours mentir? Vous vous souuenez que tout ce premier iour s'en alla en diuers combats de l'Eglise contre l'Antechrist, et à quelques autres preparatifs propres à representer ce qui fut exhibé le iour suyuant: et que le pape ny fut veu, ni aucune sentence prononcée. Mais pour faire tomber plus plausiblement son foudre sur le pape et ses adhérans, il s'est fait à croire que l'eglise aye esté le pape, bien qu'elle fut habillée en femme, et que souuent elle, et les autres qui l'accompagnoient sur le theatre luy attribuassent le nom d'Eglise, sans iamais nommer vne fois le pape.

Ensuite de cecy c'eust esté bien merueille s'il se fust oublié du purgatoire. Il s'en donnera bien de garde : escoutez ce qu'il dit. « Ils charpenterent aussi vn purgatoire. »

Tu le nommes (Malin) pour te moquer de ce poinct de la foy catholique, et tu le mets en auant pour ne changer rien de ton train à mentir. Autant fut veu le purgatoire, ou parlé